

FILEMON

Pablo saludashcamunda

1 ¹ Cristo Jesusta parlushcamunda prezu tiyaguj Pablomi cai cartadaga huauqui Timoteon ñucuchin igulda ruruj c'uyashca Filemonmu, ² shinalladi cambuj huasibi tandanucuj crijcunamu, pani Apiamu, ñucuchi laya soldado shina huauqui Arquipomush cachanchi. ³ Ñucuchij Taita Dios shinaidi Manduj Jesucristosh Paibuj cushca alligunada c'uilla causidash cangunamu cuchun.

Filemonbuj c'uyimundash alli crishcamundash

⁴⁻⁵ Manduj Jesusta can alli crisha shinaidi tuqui linshuyachishcagunadash c'uyuj gashcadami uyugani. Shinushcamundaga Diosta mañusha canda yuyarishaga Diosta 'Diosolopai' nigunillami. ⁶ Cristobi tuqui alligunada charishcada can illijta intindingu Paida crishcada parlachun Diosta mañani. ⁷ Huauqui Filemón, linshuyachishcagunaj shunguda can cushiyachishcamundaga cambuj c'uyimi ñaubujmu rinada ñucamu manchanaidi cushiyachin.

“Onesimoda cutin japibai,” nishcamunda

⁸ Chimunda ñuca Cristobi gasha can imada ruranada jinchi shimigunan mandi pudini; ⁹ shina gaquish c'uyin gashcamundaga ashtan canda rugaguni. Nucaga rucu Pablomi gani. Cristo Jesusta parlashcamunda cununga prezush tiyaguni. ¹⁰ Shinushaga ñucaj churi laya Onesimomunda canda rugani. Carcelbi gasha crinabi

paibuj taita laya^a tucugani. ¹¹ Sarunga paiga canmunga imaquish na vali esclavomiga; cununga canmush ñucamush imadash rurusha ayudangami.

¹² Ñuca manchanaidi c'uyashcadaga paidatimi cambujmu cachani. ¹³ Alli Shimida parlushcamunda prezu tiyashcabi cambuj randi ñucada caibi ayudasha ñucan saquirichunmi munugani. ¹⁴ Shinash ñuca rugushca, ama mandushcallamunda ashtangarin can quiquin munin rurashca gachunmi, narij can 'Ari' nijllabidijca imadash na rurush niganichu. ¹⁵ Onésimo cambujmunda asha p'unllagunada laduyashcaga^b paida na tucuribujta can japichun chibujchari tucuga. ¹⁶ Cununga paiga ña na huatashca shinachu, ashtanbish huatashcada yalli gashash munushca shuj huauqui shinami. Ñucamunga manchanaidi alli munashcami, ashtan canmungarin yalli alli rijsishca gashcamunda, Manduj Jesusta crij gashcamundash yalli c'uyashcami.

¹⁷ Shinaquiga can ñucan igulda purij gashcamundaga, ñucada japijma laya paida japingui. ¹⁸ Pai ima na allida rurashcaquish na gashaga imada vueltachina gaquish ñucada cobrangui. ¹⁹ Ñuca Pablolladimi caida ñucaj maquin escribini. Chi cobrashcada ñuca pagashami. Cangarin, mushuj causida japishcamunda ñucamu dibinguimi, shinash ña na parlushachu. ²⁰ Ari, huauqui, Manduj Jesusbi cai mañushcada ñucamu rurusha, Cristobi ñucaj shunguda cushichibai. ²¹ Can cazunada crisha, cai ñuca mañashcada ashtan yalli ruranada yachusha escribini.

^a**1.10** Onesimoga Pablo carcelbi gasha parlaquimi crij tucuga.

^b**1.15** Onésimo miticusha riquish Diosca Filemonbuj Onesimobuquish allibujtaga ruraguga. Rom 8.28-da ricuna.

²² Canguna Diosta mañagushcamunda cangunada ricuchun Pai ñucada cachachunmi shuyaguni. Shinusha maibi ñuca samarinadash parijangui.

Tucurina yuyigunamunda

^{23–24} Cristo Jesusta parlushcamunda ñucan igulda carcelbi tiyuj Epafra bish, shinaidi ñucan igulda rurujcuna Marcos, Aristarco, Demas, Lucas bish saludangunami.

²⁵ Manduj Jesucristo cushca alliguna cangun gachun.